

四庫全書

集部

欽定四庫全書

集部

倪文僖集卷三

一至三

詳校官庶吉士臣陳若霖

中書臣劉源溥覆勘

總校官檢討臣何思鈞

校對官編修臣汪鏞

謄錄監生臣翟灝

欽定四庫全書

集部六

倪文僖集

別集類五明

提要

臣等謹案倪文僖集三十二卷明倪謙撰謙字克讓號靜存上元人正統己未進士及第官至南京禮部尚書謚文僖據李東陽序謙所作有玉堂稿一百卷上谷稿八卷歸田稿四十三卷南宮稿二十卷又有奉使朝鮮之

作為遼海編別行於世今皆未見此本凡賦辭琴操古今體詩詩餘十一卷頌贊表牋箴銘一卷文二十卷蓋謙所自編於生平著作汰存六分之一者也三楊臺閣之體至弘正之間而極弊闡冗膚廓幾於萬喙一音謙當有明盛時去開國之初未遠前輩流風餘韻往往而存故其文步驟謹嚴樸而不俚簡而不陋體近三楊而未染其末流之失雖不及

李東陽之籠罩一時而有質有文亦彬然自成一家矣固未可以聲價之重輕為文章之優劣也乾隆四十五年五月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

提要

倪文僖集原序

文一也而所施異地故體裁亦隨之館閣之文鋪典章
裨道化其體蓋典則正大明而不晦達而不滯而惟適
於用山林之文尚志節遠聲利其體則清聳奇峻滌陳
難冗以成一家之論二者固皆天下所不可無而要其
極有不能合者故君子觀人之文不必識其面聞其論
議親見其所施為而其器識材用之稱乎此或宜乎彼
斷斷乎其可別已是雖殊世異代操吾說以求之無所

不得矧耳目所接風聲義槩之在天下方盛而不可泯者哉東陽辱青谿倪先生舜咨為同年交最深獲見其先文僖公樂與天下士誦公所為文舊矣公居南京有火厄手掇舊稿數帙以出青谿復力檢得之雖頗散佚尚多不能盡錄公既沒青谿乃取公所自編訂者為三十二卷刻梓以傳東陽始得而備見之作而歎曰我國朝定鼎開基奄有六合光嶽之氣全得于天自高皇時宋學士景濂諸公首任制作而猶未得位文皇更化楊

文貞諸公亟起而振之天下之休養涵育以暨英廟之初富庶之效可謂極盛矣而劉文安諸公出焉逮于憲廟其用猶未已也時則有若文僖公相與先後揚厲其名大著其在景泰間應制賦詩中官常立俟以進自餘碑板金石之文雲涌川溢沛不可禦嘗奉使朝鮮即席命筆略不構思國人皆縮頸吐舌駭歎不能已及歸梓其作為編至于今存焉蓋公之雄才絕識學充其身而形之乎言典雅明達卓然館閣之體非巖棲穴處者所

能到也故雖中歷艱險晚登通要不得盡見于用而其
於典章道化關一代之盛以為後觀者如此豈非不朽
之事哉昔孫盛作晉春秋傳之外國後有購者於遼東
得之宋孫甫作唐書甚自珍惜嘗火後歸問其書他不
復顧斯文出處與此正同然二氏之書卒不見于世者
謂其子孫不足以繼之也公修英廟實錄未及終青谿
繼入翰林以成事告校諸前代其班馬氏之風乎且青
谿為學士為禮部侍郎尚書趾美承閥當代所僅見行

業之著其於公益有光焉後世稱江東倪氏之盛者殆不獨文之為重而文其徵也是固不可以不傳已公諱謙字克讓學者稱為靜存先生已未進士及第官至南京禮部尚書致仕卒贈太子少保文僖其賜謚也文有玉堂稿百卷上谷稿八卷歸田稿四十二卷南宮稿二十卷通為卷百七十則裒為家集青谿與其弟工部主事阜輦共藏之而遼海編別行于世云弘治癸丑秋八月一日賜進士出身中順大夫太常寺少卿兼翰林院

侍講學士經筵講讀官兼修國史晚生長沙李東陽序

欽定四庫全書

倪文僖集卷一

明 倪謙 撰

賦

早春賦

景泰四年正月二十六日應制

叙曰孟春者四時開闢之端生育之首天地交泰萬物
亨通古先哲后政令所行罔不因時之宜故於是月下
寬大之書行慶賜之典所以體好生之盛德也肆惟皇

上臨御之四年為景泰癸酉時維初陽盛德在木皇上既於元旦受萬方朝賀中外畢集拜舞稱慶固已令人之驩戴矣復於辛日祀上帝於南郊風塵屏息瑞日晴麗又有以致天心之昭格焉迺者滌垢掩瑕行慶施惠裁成輔相參贊兩間四海臣民咸遂生育其法天體德之心與古先哲后實同一揆是以和氣薰蒸充塞宇宙條風應候惠日暄妍庶草蕃庶物無疵癟鳥獸魚鼈罔不咸若則自天降康豐年穰穰從可卜矣臣猥以菲材

職司文翰伏覩盛美不勝忻忭謹拜手稽首而獻賦賦
曰繫日臨於營室兮開六合之朗晴呈山川之秀麗兮
發草木之光榮散瑞靄之氤氳兮布和氣之淡蕩表盛
世之休徵兮信豐年之氣象惟斯時為何時兮屬句芒
之御辰幹一元之氣機兮回八荒之蚤春騰龍精之戒
旦兮正青陽之司候攝提指乎孟陬兮玉律中乎太簇
既配仁於四德兮復屬木於五行乾坤坱兮以無垠兮
動植樂育於生成漏暖信於梅枝兮見天心之來復窺

韶光於柳眼兮驗百卉之回綠劃殘澌之已泮兮增太
液之清波倏積雪之盡融兮鬱瓊島之塞哉鴈噭噭以
思歸兮羌呼羣於水曲鳥嚶嚶以將鳴兮欲遷喬於幽
谷蟄蟲闔其啓戶兮紛蠕動而翾飛潛鱗躍以上冰兮
競鼓鬚而揚鬢探上林之桃杏兮含無窮之芳意况御
苑之蜂蝶兮亦聯翩其遊戲感萬物之暢達兮乘淑氣
以陶鎔想春光之九十兮塞宇宙之冲融仰聖皇之御
極兮邁唐虞之盛德宣體元而居正兮茂對時而育物

開明堂以布政兮居青陽之左今乘鸞輶而駕倉龍兮
慶賜行而弘播躬郊壇之祀事兮格精誠於昊蒼修祖
廟之肆享兮通肸蠁於先皇為萬民而祈穀兮曰農事
之當布懸象魏於觀闈兮謹昭宣乎憲度施政教以順
序兮渙號令以維新運堪輿之妙用兮法造化之深仁
恩波溢於海寓兮祥光被乎四表惠溥及於鯀淵兮澤
旁覃於胎夭在日月之所照兮及舟車之所通具顯圓
而趾方兮孰不涵煦於覆幬之中顧微臣之膚陋兮徒

竊祿而無補聖德奚以名言兮惟頌歌而蹈舞歌曰震
宮初動時孟陽兮木德惟仁萬彙昌兮惟聖天子開明
堂兮流慶施惠法天常兮玉燭和調日舒長兮世躋春
臺俗醇厖兮河海清晏邁虞唐兮四夷賓服來享王兮
小臣作頌肆揄揚兮伏願聖壽億載無疆兮

聽鶴軒賦 有序

予友郭君彥理襄在南京嘗持聽鶴軒卷索予為賦予
時偕計北上迫於試期不獲遂所請今從親至京復出

此卷示予展視則已為華胄勲衛公所先姑亦效顰於
末非故與之角貴不爽舊約焉耳其詞曰

弭余節於瀛洲兮陪羣仙以遨遊聆天風之下上兮落清響
於高秋靜余武以延佇兮愛餘音之斷續覺塵耳之頓豁兮
漱寒泉於一掬恍羣真之禮極兮鏘珮玉其琳琅疑鈞天
之廣樂兮律協應於宮商道逢余之故友兮序汾陽之
世譜爰傾耳以告余兮斯乃胎禽之送語曰予嘗豢此
兮儼真素之芳容匪吾子之見賞兮孰能得夫予心之

所同噭粉黛其駢列兮紛搗箏而擊筑拂梁塵以遏行
雲兮適足盡心而蕩目嘅風雅於中古兮曾一聲之莫
遺引圓吭以振羽兮若大音之正希繫生物之有聲兮
形氣軋以相成繁噪者亂吾慮兮哀怨者傷我情惟伯
趙之與鶯黃兮肆頰舌其無餘憐燕鴈之來往兮歎梟
獍之不可與居彼讎渠之急難兮羌不可道也罹鴟鴞
以嘵嘵兮又杌巍而莫之好也豈若吾之仙客兮出青
田之世族形歷世以屢變兮壽千齡而不足養圓顧之

渥丹兮曳裳衣之玄縞飲瑤池之玉液兮啄玄圃之瑤
草席威耽之遺慶兮策南征之故勛匪子晉而莫馭兮
豈士衡而得聞夜警露以長鳴兮旦冲霄而礪翼訪逋
老於孤山兮夢坡仙於赤壁心孚契以蘭臭兮結新盟
於歲寒時興逸而起舞兮發纓尾之清彈徹塵馬於寥
廓兮駭窻鷄之辟易諒知音其既覩兮願療此烟霞之
痼疾予聞已以蹶生兮嘉物理之善窮昔孔聖之耳順
兮貴聲入而心通彼鳴臯而聞于天兮固無微而不灼

在陰而子和兮信可靡於好爵睠閭闔其咫尺兮宜排
雲以上呼跨黃樓之六翮兮斫蟾窟之桂株待震霆之
起蟄兮露嶄然之頭角簉鷁鷺之清班兮接鳳凰於阿
閣斯時也余將與子共遊樂於靈囿兮重聽夫白鳥之

鶩鶩

瓊花圖賦

有序

后土瓊花世傳天下惟一本金完顏亮至揚州揭之而去自是遂絕後人以八仙花代植故處金貢士伯玉求

吳中書希純畫此花索題其上故為之賦

元造運兮無停羣彙勃兮生成曾物物以雕刻乃自色而自
形何瓊芳之毓秀擅穠華於廣陵繫幽魂兮久逝恍喚起兮
如醒爾其媒麝揚芬毛錐脫頰意近方玄天機乍警剪瑤
島之纖雲印碧紗之清影柔柯澹兮相依密葉蔚兮交
映紛總總其繁英訝晚粧之間靚蓋能駐春色以常存
幹化工而自驄者也當其結根后土破萼蕃釐冰鬚綴
粟素臉凝脂粲玉容兮照眼藹天香兮逼肌鮮颯動搖

步宓妃於洛浦零露厭浥醉阿母於瑤池凝玄圃之仙
卉儻六丁之夜移羌地靈兮所鍾豈人力兮能為頓使
羣英失艷千葩奪奇諒寰宇之獨步意東皇之見私遂
令江都之名勝境因物而猶垂也乃若遷客追懽騷人
繼訪雅韻爭裁高吟競爽唐昌觀裏浪誇仙女之遊無
雙亭畔素愜醉翁之賞想神物兮禁訶壽千齡兮無恙
奈邊騎之方來揭本根而長往待息體於遺蘖終褫魂
於槁壤覽物理之興衰慨予情於俯仰彼靈區兮猶昔

望嫩人兮不還繼芳蹤者誰子惟見聚窈窕兮八仙匪
託跡於劍素將孰識其孤妍噫吁兮麒麟之生異乎犬
羊鸞鷟之翥爛乎文章是皆出則應瑞見而靡常顧茲
瓊芳之拔萃抑亦和氣之醞釀雖器車兮莫儻殆三秀
兮可方然而鳥獸草木信希世而呈祥者矣則夫公卿
將相豈有種而流芳也哉

種德堂賦

有序

吏部考功郎中永豐彭先生嘗出其曾祖雪崖先生種

德堂卷示謙知雪崖系出宋御史中丞公之後以醫活人子及孫世其業至先生昆季發身科第列職中外先生冢嗣公鼎貳縣東莞羣從盛而且賢君子謂為種德之報也縉紳大夫著為文辭述之備矣先生不以謙為不敏特命賦之不敢以蕪陋辭謹製斯賦以復賦曰

永豐之邑潭西之濱有隱君子雪崖先生之居為宋御史中丞九世之孫抱遺經而不售外聲利如浮雲廣善藥之貯儲濟斯民之遘瘠有翼其堂扁曰種德方寸之地

是為阡陌俾綿綿之若根見芄芄其允植收所獲於百
年譬有秋於力穡者也爾其載芟載柞固為善畊使無
良疇厥功曷成或耘或耔固為善藝使無嘉種厥生曷
冀必大田之既戒復鑑基之待時始東作而可興羌耒
耜其能施然而或水旱之相仍或螟螣之蕃滋孤終歲
之勤勤乃求餉而得飢孰若此德根于性天匪有假於
外求第反躬而自全苟栽培之日厚謁生意之勃然顧
後難以無虞恒豐腴而有年想其蒔之以仁播之以義

易以禮樂壅以孝弟振聲華以若苗懷忠信其如穂以
謙遜為溝洫來淵泉之善類以明決為耰鋤去稂莠之
私偽豈助長以戕生惟直養於浩氣亶心逸而日休順
所天而無媿誓秉志以終身諒食報於來世猗歟先生
古賢為傳靈續續以上征澤津津而下流有孝子而不
匱更孫枝之好脩擅家學以專門克紹述於箕裘逮曾
玄而益大信復始於公侯彼曾者何含浦雙珠伯天曹
以考功仲王門而曳裾擢科第以聯芳歇中外之美譽

彼玄者何藍田羣玉長佐邑以峨松季待價而韞匱皆
懷瑾以抱瑜方以似而以續繫此德以既苗嘉肯播以
相承印天道其不爽宜後葉之迭興昔三槐之陰連與
五桂之芳騰由本固而末茂實異代以同徵爰引長而
弗替將蔓延而曷勝挹前哲之高風悵九京其莫作緬
遺範之可師允有開於後覺胡愚黔之蚩蚩致牛山之
濯濯既蕪穢以就荒抑何望於能獲念揄揚於世美託
文辭而永垂紛篇章以有述粲璣琲之陸離舉陶旄之

竊妄敢廁陳於鼎彝擣毫端之覩縷寄仰止之遐思

竹塢精舍賦

有序

竹塢精舍者蘇之崑山錢君景和藏脩之所也景和家食時嘗愛竹有歲寒之操環植舍外森然有淇澳湘水之勝其清尚之志可見矣景和茲膺刻薦起為侯門師範乃以是徵題於予予嘉其請之勤也遂援筆為之賦崑山之麓有林蔚然結重陰於十畝鴻靈籟於九天露葉低回翔紫鸞之夭矯霜竿離立倚翠袖之嬋娟

羽葆張兮待月碧玉煖兮生烟逗薰風以脫綳冒夜雨而行鞭時有曠達之士避俗之賢託之為友望之若仙闢精舍以相狎日盤礴於其間或膝其琴或手其編坐芳根以對奕藉蒼苔而肆筵拊琅玕以吟嘯髻鬟汎湘浦而入淇園也一日舍之主人遊樂之倦隱凡而息夢一塊特君子長身秀眉青衿翠幘俯而揖拱而立曰天下之物可愛者多矣何獨於竹而見溺乎將謂其色堪玩則葱蒨者孰若粉黛之妍哲其聲宜聽則鏗戛者孰

若管絃之繁急清標之芬豈勝麝蘭之襲稚筍之味寧似肥鮮之適乃棄彼而不御顧於茲而致憚子之意其亦有所擇乎否耶主人曰不然吾之愛夫竹以其有德也彼其羣而不黨直而不撓虛乎有容潔然自高溪壑幽閒足以遂其性霜雪嚴沴不能變其操此子猷所以一日不可無而七賢六逸恒於是乎遊遨也若乃葩華穠膩艷冶哇淫雖可愜情而快目適足喪志而蠹心疇似此君之冷淡與之交歲久而彌深哉君子曰子之於

竹可謂真能愛矣既知愛之慎勿害之彼元之也與之
何仇忍剗其腹以建黃州之樓此子陵也與之何疵竟
剪其支以繫桐江之絲或操之為籩篚或辱之為帚箕
固因材而見取抑豈此君之所宜子尚戒於斯可也主
人矍然曰天之生物必資於用藏器於身待時而動使
伶倫之有求亦不一往奏九成而來儀鳳乎於是君子
軒然大嗟爾汝忘機倏風雷之破壁化為龍而奮飛遂
蘧蘧以驚寤但見翠華之滿衣

觀泉賦

當春日之載陽兮柳裊裊以垂絲暢冲襟以抒寫兮陟層臺而自怡雲冉冉其出岫兮風飄飄而吹衣瞻翠巖之石罅兮縣瀑颯其雙馳恍銀河之倒瀉兮訝玉龍之競飛神爽忽焉飛越兮人世杳然以如遺慨古今之禪代兮少日壯而老以衰惟茲流之噴薄兮亘四時而不移嗟人生其如寄兮徒擾擾將何為傷余懷以興感兮足踟躕其忘歸

辭

壽譏堂辭

覽名區之殷庶兮紛甲第以次鱗中華棟之肯構兮藹庭戶以藏春挹穠英之餘馥兮曰叢譏之攸植介慈闡之壽考兮賴憂忘而樂集繫嫩人之克孝兮羨嘉卉之標竒豈移根於玄圃兮抑接畛於瑤池涼露漱其芳潤兮晴吹梳其翠葆鍾淑秀於玄造兮毓靈芬於富媼惟蟠木可共譜兮必瑞芝可連苗期後天而不老兮凌三

光以同凋將倚檻以載觀兮頻緩頰以微哂齡胡慕於
錢鏗兮卜胡問於詹尹嘵莊椿以早謝兮羌三釜而莫
將鼓坎坎以承懼兮舞蹲蹲仍自傷雖物理之難齊兮
實顯融於不朽也盡愛日以寧親兮固將壽茲謾於同
父也亂曰謾之敷榮厥得地兮綠葉黃華紛表瑞兮能
忘親憂樂罔既兮眉壽無疆俾昌熾兮立朝有子珮玉
珊瑚兮宸翰昭回誥竚頌兮謾燈增輝親解顏兮華堂永
固歸乎並南山兮

梅月辭

歲冉冉以將晏兮肅萬里之冰霜山林黯然消瘦兮草木蕭其摧傷何天意之有偏兮獨儲美於孤芳先百花以競放兮早有得於春陽粲珠璣之錯落兮挿繁英於晴昊當六雪之纊紛兮羌迎寒而索咲骨稜稜以屈鐵兮膚淡淡以凝脂振江妃之瓊珮兮浴王母之瑤池逗微風以馥郁兮度暗香而襲人塞獨立而無偶兮淨不染乎纖塵睠江南之久違兮別幽姿而莫親悵驛使之

空來兮誰寄余一枝之春繫若人之神妙兮拔紫毫於
秋免灑蒼松之翠烟兮為傳神於縫素忽披圖而宛見
兮儼橫影於孤村胥蟾華於南枝兮照萬古之冰魂慨
月姊與花神兮洗鉛華而相映豈藐姑射之仙子兮整
靚粧而臨鏡入華光之三昧兮得補之之不傳炯清光
於眼底兮覺化工以無權余愛之而不能舍兮首屢徃
而回顧聊滌余鐵石之心腸兮效廣平而作賦

琴操

風木操題文學江先生風木圖

有樹芃芃兮山之阿
樹枝欲靜兮天風多
風不停兮柰爾何
兒有祿養兮為親怡
親不待兮將何為
感慕魚兮淚空垂
我語天風兮莫吹彼
樹上鳥彼鳥能反哺
亞亞引其離嗟嗟
我生兮不如鳥

古詩四言

君子之驄

有序

君子之驄別李公也
李公以國學儒彥入憲臺為御史

宦轍所至有聲時望攸屬祇奉綸音總理畿內學政錢

唐倪某故作是詩以贈云

君子之騁載驟載馳駕言行邁孰授之維曷云能維帝

命是將蹇蹇匪躬矧敢怠遑宜無他人式舉憲綱不如

君子德音孔彰文化久孚善政亟布海隅江左謳歌載

路山有松柏澤有蘭苔皇畿千里濟濟譽髦敬敷在寬

哲后明訓爰嗣鐸響有鉤其振相彼小子侯國之琛因材

長育其成若林時雨沃之仁風薄之曉言歸只天子樂之

君子之驥四章章八句

慈烏

有序

慈烏憫孝子也四明宋子昇早喪父賴母訓以底成立而母亦繼歿後遷西夏追慕不忘作堂扁曰思訓錢唐倪某為體其意而作是詩焉

慈烏在林爰返其哺哀哀母氏棄我弗顧慈烏在林載飛載集哀哀母氏棄我弗卹人孰無父我獨早孤人孰無母我獨告殂昊天悠悠降此大咎憂心憧憧疢如疾

首朝躋於堂淚交我頤夕降於堂淚瀆我衣我績我蠶
我書我詩惟母之訓云何弗思蘭山蒼蒼蘄水湯湯心之
思矣曷惟有忘蘭山岌岌蘄水湜湜心之思矣曷其有極

慈烏六章四章章四句二章章八句

萱堂

有序

萱堂壽賢母也詹事府簿趙君有母夏淑德著于宗族
嘗夢感錦帨生二子伯曰敏以科第起家為校官仲曰
政即府簿也有孫八人一領鄉解君子謂為積善之澤

云今年壽屆八十康寧無恙府簿君祿仕於朝欲迎養
未獲懸念不已予嘉其孝為作是詩俾寓歸光溪以為
賢母初度之頌焉

彼茁者萱于堂之堦母氏戾止心乎孔憚其憚維何錦
帨告祥邕邕雙鳳斐然有章名之達矣以顯以揚彼茁
者萱于堂之背母氏戾止心乎孔憚其憚維何孫枝詫詫
元兮愷兮洵美且仁亦有克子踐迺後塵彼茁者萱于堂
之階母氏戾止心乎孔諧其諧維何齒聿云耄淑德柔嘉

享有毒考自天降康永錫難老豈無天祿為養匪薄豈無旨酒式燕以樂孫子若兮母兮喙兮壽考無期等喬岳兮

萱堂四章三章章十句一章八句

倪文僖集卷一

欽定四庫全書

倪文僖集卷二

明 倪謙 撰

古詩五言

金臺詠

憶昔燕昭王招賢築高臺千金市駿骨郭隗乃良媒方
延樂毅至復數鄒衍才猗與劇辛輩袞袞彈冠來得道
信多助英風颶九垓芳躅久淪謝遺趾猶崔嵬落日伏

狐兔清霜披草萊悠悠覽陳跡仰止情徘徊

遊正陽門

茲晨值休沐高步城南樓徘徊俯層構一覽八極周吾
皇馭宸極善繼弘遠猷羣工樂趨事神功不日收萬雉
切霄漢八窓千斗牛提封億萬里賦貢走夷首增崇天
府國偉冠帝王州抽毫未能賦微吟紀斯遊

送同年李進士郁歸省

憶昔挾長策同上黃金臺排雲叫闇闔競吐琅玕才日

華麗五色星采聯三台春風曲江宴爛醉流霞杯香衢
控玉勒飛蓋相追隨長歌激層漢此樂真快哉遂令名
與姓一日傳九垓鵠立侍通明恍若登蓬萊我約赴星
期袖拂天香回君思定省曠又向家山來解后遇金陵
傾寫懷抱開交深志逾合敬久情不衰欣然叙疇昨共
酌葡萄醅未諧投轄歡且復張帆催飛飛白雲遠森森
清流洄到家親意舒喜色知盈腮升堂奉甘旨拜舞應
徘徊豈惟邦家光實為閭里輝私恩既云遂公義未可

乘涉川藉舟楫調鼎資鹽梅我將駕大舶臨風邈長淮
朝陽葦葦枝高岡遲鳳喈聊茲一分手離思那能裁

題竹蘭古石

湘皋風雨深磊磊石應長芳華散幽馥寒玉搖清響彼
棘何夭夭託根乃同壤千古仲尼心援琴動遐想

畊樂翁

春風動阡陌萬彙俱欣欣負郭數頃田及時畊且耘朝
帶西疇雨暮拂東皋雲蒸凡草長禾黍不辭霑體勤婦子

事晨鑪羨藜筆香芹日入荷鉏歸遠下牛羊羣山村四
五家鷄犬聲相聞秋成共收穫遺秉何紛紜但見倉庾
盈孰知塵世氛瓦盆注新綠暢飲總成醺醉來歌擊壤
比樂寧可云既慕鹿門老永懷盤谷君斗酒欲相勞銀
魚未能焚

陳氏終節堂

挺挺霜崖松泠泠古井泉伊人秉貞潔可以况清堅芳
齡二八餘于時移所天白首殼同室豈云中道捐結帨

甫六載矢心期永年遺息方在哺顧影常悲憐從茲屏
膏沐孝養志惓惓蔬食每不足姑嫜飽肥鮮殷勤脫簪
珥為粥簡與編幸侍二親老繼復歸重淵艱苦已備嘗
家立子且賢高堂坐華旦綵衣舞蹁躚抗節世多有孰
保終始全景行人所欽青史容無傳

永思堂為錢唐朱彥明賦

椿萱嗟已零棣萼繼凋喪永佩過庭言無復倚門望始
賴伯氏存亦拊泉臺墓子立復何依旦夕增悽愴惶惶

沒世悲耿耿終天悵願言守厥身名宗庶能亢

山水畫

蒼山疊秋旻巖壑鬱蕭爽虛亭闌無人古道絕來鞅雲
迷遠近村樹隔東西瀼安得濯塵襟中林恣幽賞

送陶進士希文南還

丹穴有鳳離復出風塵表振羽凌紫霞翩翩五雲統一
朝覽德輝下翶梧岡曉和鳴叶九奏快舉愕羣鳥方冀
巢阿閣更許浴靈沼何為鍛其翮相違向中道依依送

將歸開尊寫襟抱靈物孰能遺歲寒宜自保嘵我本潛
鱗尚逐魚在藻終當入蓬瀛相從拾瑤草

石蒲畫二首

齒齒水中石脩脩石上蒲清風一披拂踈翠自紛敷宛
若避世人悠然山澤曜坐疑碧溪月移影在庭闕

青蒲翳拳石秀碧浮東海龍骨自糾纏霜鬚更瀟灑九
節信通靈四時常不改不遇九疑仙中流復誰採

題畫金蘭

柔毫奪化工寫此湘皋榮猗猗轉光風粲粲敷金英此
君靜相倚歲寒同結盟珍重置座隅將況交友情金以
堅利斷蘭以揚芳馨

王母儲氏貞節詠

盛年結褵時擇配良偶諧將期共白首遽云中道乖大
義徃從之豈復惜餘歡仰思親在堂俯痛子在懷如蔬
保貞潔蓬首仍無釵從一志靡移寧如枳逾淮竭力奉
姑嫜孝養誰能儕青燈課兒學賢希參與榮壽今過古

稀德光詎終埋赫赫頌旌書昭昭下天階綽楔表高門
榮寵垂無涯千古共姜節清風與之偕

贈趙生文博西還

昔我占科名所學慚未充一朝拜官爵謬廁詞林中吾
子鴈門俊鼓篋游泮宮不辭負笈勞千里來相從自視
尚昏昏何以啟子蒙嘉子志勤駕館置幽軒東篝燈誦
經史午夜聲淵淵問辯恣研討物理靡不窮操觚事修
辭吐語超凡庸磨瑕刮其垢文藻尤春容由子性明朗

有若金在鎔荏苒經二霜所得亦已豐矯首懷故都歸
思何匆匆再拜別我去嚴城動晨鐘時當秋氣涼一葉
飄井桐到家展省餘事業宜專攻况子宰臣後鄉里稱
儒宗賓興諒不遠高折丹桂叢偕計上春官朝端會重
逢遇勉崇令德庶俾聲光隆

薩編修母挽詩

桑榆景西頽耿耿即亥夜八旬逾二齡溘然遽殂謝平
生遘多艱辛勤靡偷暇姑病謹扶持為禱北辰下豈惟

侍湯藥甘旨極豐腴喪葬禮咸備夫孝名與俱夫亡屏膏沐家貧恒晏如詩書課遺肩喜踐青雲衢雲衢豈不好所傷隔遠道封章未及榮玉軀已難保翩翩南飛鳥憂心愁如擣淚灑玳山原流丹漬秋草

中村別業和草廬先生韻為臨淮尹彭光賦

憶昔中村居名流盛詩賦百年何所餘合抱當時樹良疇盡膏腴豐年詠多稌况負邑城南相違一舍許桑麻遂敷榮牛羊樂孳乳繫繫近古墳宰木烟雲昏日落雙

鍾畔惟應孤兔蹲欲持一杯酒徃憫千載魂承家有賢
令餘慶知長存尚期守茲業綿綿在兒孫

陪祀三陵倡和詩

時正統丁卯長至也

出都城用曉字

嗣皇謹時思蒸祀烈祖考攝行遣貴戚分陪及微眇陞
辭赴三陵出郭天乍曉員精升暘谷晴暉散林杪況當
一陽生便覺春意早仰顧天壽山巍巍倚天表

途中遇風用色字

蜚廉西北來長途肆狂憤鞭驕渡清河凜冽勢轉亟揚
沙昧雙眸舉袂頻自拭豈容披襟當正藉貂裘敵行行
抵山陵薄暮殊未息且須就村舍把酒憇寒色

入山用林字

同寅二三友聯鑣陟巔峩峩龍虎地蒼蒼松檜林愛
日麗中天寶殿光流金三陵若鼎峙永鎮坤維深聖靈
仰在天何以致居敬虔恭相明祀精白惟此心

謁陵用間字

閔宮閑清穆三后奠此山古蠲致孝享玉陛聯清班祠
官獻爵帛秩秩儀度闊高明以承祀儼若臨天顏列炬
爛有輝高暎河漢間禮成夜逾半策馬行當還

送郭儀

風雅三百篇刪定自魯叟齊韓毛鄭流箋訓非一手千
載何違從異說互紛糾不有紫陽翁疇能撤其蔀至理
煥以昭回粲星斗坐令三代前溫柔見敷厚郭生英
妙姿好學志不苟執經遠相依羣疑藉分割媿非萬石

鍾何由啟撞叩所喜務研精不間辰與酉展卷鷹隼視
落筆龍蛇走乃知物其中必在勤斯有京華歲將淹思
親重翹首別我向恒陽升堂娛父母戲著菜子衣滿獻
椒花酒再拜慶履長敬祝期頤壽方今際休明麟鳳在
郊藪期爾與之游此意還知否新春景暄妍和風散虛
牖母為中道捐虧簾同培塿

題蘭寄潘景瑞

有序

浦城潘君景瑞為吾應天教授節菴李先生之婿也景

瑞為館甥時嘗與予講學於玉兔泉東書樓之上情好甚洽尋以遭乃尊鴻臚府君喪扶柩還閩遂爾別去邇來十有餘年矣每一思之未嘗不引睇南望也適其姻姪余正術考績來京始得詢其起居之詳然予聞之古人之交友有曰金蘭契者蓋取易同心之語也茲正術歸無以為景瑞贈因求中書希純吳先生作為墨蘭并題數語於上託正術以寓景瑞庶以附於古人交契之義而伸久別之忱云予之所望將必有徵於他日也

叢蘭在幽谷濯濯冰雪姿霜筠共貞操楚楚琅玕枝光風
汎踈穎白露凝華滋清芬被百草豈為無人知我欲結
為佩采芳薦彤墀怡悵隔澧浦路遠莫致之悠悠十年
別迢迢千里思含情托毫素永固同心期

清心軒為徐彥澄賦

至人本無欲賢者能寡之天真洞軒豁靈臺果何疵彼
哉夸毗子汨汨務外馳玄珠濁水昏寶鑑凝塵繙疇能
濯與拭粲然發光輝南州孺子孫克己恒自持冀令方

寸間清如湛漣漪心清萬理明酬應靡不宜寧知衆欲
攻伺隙抵我巇勉焉慎毋間素魄當空垂

題畫龍

蟠泥伍魚鼈疇能識其神一朝雲雷便奮躍飛天津葉
公宣真好劉累安可馴蒼生望已久為霖沾八垠

題畫虎

錦文何斑斑電目復煒煒日落嘯空山百獸皆披靡橫
道正磨牙在阱乃搖尾威彊勿終恃君子貴循理

雙節行 為華靖賦

曾姬正青年嫁作朱家婦三歲喪移天一女方在哺

一解

辛苦奉姑嫜育女已及笄貳室得賢婿絲蘿幸有依

二解

夫婿亦云亡呱呱遺弱子子母共居慈矢心如白水

三解

送楊侍講還陝省墓分韻得杞字

我舟故鄉回君帆亦南下相逢白下橋襟懷倍傾寫金陵最佳麗遊覽時並馬攀蘿扶幽僻歷磴窮清雅暫會

忽云別解袂若陶瓦迨迨咸陽道烟雲護松櫟展墓伸
孝思椒漿奠瓊筭君能濟時艱非可閒逸者北轍宜早
旋努力支大厦會食玉堂杯明年殆同把

題墨梅

歲晚霜風嚴萬木僵欲折胡為此粲者孤高挺奇節瀟
然出世姿不受塵土涅繁英挿晴昊瘦骨欺寒雪華光
寫其真照眼色清澈渾疑藐姑射羣仙振環玦和羨他
日事老幹且屈鐵肯學桃李花徒媚兒女悅

集陶挽王守正主事 編修僕父也

東方有一士，委情在琴書。
清飄矯雲翮，婉娈憇通衢。
羈鳥戀舊林，息駕歸閒居。
步步尋往迹，浪莽林野娛。
有子不留金，嘵然念黃虞。
校書亦已勤，出則陪丈輿。
荏苒歲月頽，指景限西隅。
一朝長逝後，壑舟無須臾。
誰云其人亡，至德冠鄉閭。
生有高世名，過此奚所須。
幽室亦已閉，精真今何如。
千載拊爾訣，言盡意不舒。

題四景畫

春花正堪賞春酒復可沽駕言策雙蹇挈榼携奚奴溪
橋縱閒適風旆遙招呼暖香襲襟袂粲然桃李株梵宇
隔雲林亦可尋浮屠歸來錦囊重想多明月珠

竹軒啓蓬扉中有校書叟扶筇挹古桐來覓賞音友蓮
塘花亂開香氣入戶牖扁舟蕩蘭橈載送百壺酒山僧
出古寺杖錫競奔走何如俯清流唉飲拍銅斗

幽亭閒弘敞占勝居崇岡杖藜三五叟相携此徜徉俯
視木葉辭醉暈朝來霜行旅涉遠道聞僧歸上方溪漁

有至樂一葉雲水鄉撫景淡忘返遙岑留夕陽

六雪花正落積玉高峻嶒山城絕過客古寺無遊僧孰
云石徑迷有木尚可蒸孰云水脉縮有魚尚可罝攀蓋
沽酒歸擬欲澆凌兢寧知下惟士頓忘寒氣增

送曹冕中書南還省親三十四韻分得青字

宣尼古大聖訓子重過庭韋賢漠名相傳家惟一經顧
茲燕翼謀在昔有典刑引之乃弗替世德流餘馨昂昂
千里駒逸足追風霆姿儀更清澈儼若鸞鵠停巖君領

縉紳雅德崇朝廷延師務啓廸編簡對疎螢興理善研
析牛刀初發硎藻思復敏贍高屋方建瓴捨材向明時
染翰依槐廳聲譽鵠儒彥有耳無不聆時望孤雲飛思
親恨無翎睽違在南國幾易堯階莫封章徵當寧詔許
諧歸寧翩然成行李祖帳開離亭驪歌遏行雲酒傾雙
玉瓶西風掠眉鬢去去亦易醒况當秋欲深瑤空霜露
零草木屬搖落華澤凋顏形獨餘東籬菊粲粲呈修建
黃花正堪采稱觴介遐齡想當敵華讌賀客聯歌伶矯

首向中夜光射弧南星綵衣舞蹠躡絳蠟揚晶熒大斗
酌春醑孰辨渭與涇為樂未渠央至孝薄紫冥南橋北
山梓並秀何青青聖皇御宸極垂拱負扆屏渴賢屢側
席藥籠需參苓東風扇微和春意回林岧鳥聲碎花塢
草色迷烟汀此時宜北來滄江稱揚舲忠孝貴兼盡行
看承寵靈

聽秋為過庭章賦

大塊氣一噫觸物皆有聲胡為琅玕枝遇之聲更清况

當秋高時商音屬金行萬葉脫如剪昂然挺孤貞高人
抱幽獨種之周四楹時還洗塵耳宴坐聽琮錚緩若朱
絲絃疾若銜枚兵珊若珮環響鏗若宮縣鳴聽之久不
厭神爽心和平隱几得真趣萬慮何所繫我欲夜相造
為踏涼月明披襟挹天籟雙耳定須傾

梅菴為楊祖順禎賦

子海府學生

林逋去我久孰能愛孤芳諒匪高世懷視此徒悵悵江
南春欲回萬卉亦已僵老幹正屈鐵繁英傲冰霜北來

當歲寒翹想恒彷徨寧知此菴內忽挹君子香丰姿逼人清粲粲玉雪粧貞白以自守耻登桃李場豈惟吐奇芬結實味勝常和鹽薦鼎鼐需賢聞有商

賀李尚書壽八十

大學士李貽父也分韻得景字
二十二句

煌煌壽昌星午夜光現丙瑞應列仙儒八旬娛燕景素馳長者譽忠厚著鄉井積慶鍾俊良高步蓬萊頂經綸濟明時內相鈞軸秉老仙荷雅封錦誥凡四領何異尚父榮猶存武公警名位接三台祿養豐五鼎威鳳來虞

廷偉甚儀觀整適當初度期九夏日正永綺席延南薰
璧月耀東嶺盃分春酒滑碗送冰漿冷兒孫迭稱觴酌
饋祝噎哽金紫萃一堂貴盛疇與並仁者壽而康遐美
超溟涬辟穀有飛丹誰慕陶弘景

題朱用淳孝友卷

有序

用孚與兄用章客淮揚用章病用孚極力調護請於天
乞以身代用章臨絕口占詩一律言涉佛老遺言願世
為兄弟既卒歸其喪上谷交游嘉其孝友賦詩美之故

予亦有是作

韓韓常棣華粲粲紫荆樹瞻彼柯葉榮由茲本根固嗟哉弟與兄同胞均乳哺形從一體分何異手足顧京城繕甲兵淮南歌尺布澆風日逾扇絳臂視如路疇能念天顯二惠忻僅睹承懽共克諧幹蠱胥遠驚淒涼伯氏墳天涯邁沈痼姬旦彼何人仲也心切慕懇懃捐此身乞代仰天呼高玄弗見察大夢竟難寤絕筆脫塵凡遺言激衷憮瞑目賴有依旅櫬護歸祔友愛本因心至性

天所賦砥柱屹頽波古道獨回沂厚德聞四方輔世非
小故千齡孝友名可以垂竹素

倪文僖集卷二

欽定四庫全書

倪文僖集卷三

明 倪謙 撰

古詩五言

山行畫

喧煩厭塵事思此丘壑清二老有夙期杖屢山中行穿
雲入翠微漸覺路不平深林不受暑夾道如相迎長風
萬里來振作濤籟鳴新涼灑襟袂滿耳俱秋聲况携三

尺桐可以宣幽情橫膝發孤響古調餘咸英豈無考槃
叟巖棲此遯名相過叙情話濁酒時與傾興味自相賞
共結泉石盟

曉行畫

鷄鳴衆星沒駕言即長途靡靡事行邁從以兩僕夫灑
澣溪水流鬱鬱隴樹敷日高門未啟隔渚烟村孤逸蹇
樹兩耳健於千里駒長鳴度溪橋野色迷平蕪問君此
何之觀光上皇都將彈貢禹冠不受終軍繻丈夫四方

志致身乃良圖懷玉勿自銜所貴待賈沽豈若鄉井兒
齷齪惟守株

橘齋為劉傳賦

端居抱冲素一室無塵汙至道契軒農獨與世好殊后
皇有嘉樹移植當庭隅冰霜氣逾厲華葉紛榮敷清陰
覆衡宇悠然懸一壺香侵擣藥杵色暎燒丹爐豈云擬
侯封富役千頭奴摘枝飲泉水坐使沉疴甦活人藹春
意寧讓緩與盧蘇仙去世久惟君乃其徒何當造君廬

一掬從君需頰齡為子制白髮還成烏

題蕪湖陶氏所藏淵明歸去來辭圖

淵明歸去來初非薄五斗悠然獨往意寓興詩與酒三徑有菊松門垂五株柳清風北窓下羲皇以為友大書晉徵士千載名不朽至今一篇辭諷誦在人口良工得其意模寫出妙手後人能寶藏什襲若瓊珍傳家豈不美所貴德世守勉焉繼高風名宗庶無負

題小景二首

秋山秀而高秋水湛以碧山空水脉縮冉冉霜葉赤孤
村賣酒家長橋遠行客古寺數聲鐘斜陽在東壁
蒼蒼嘉樹陰高閣臨江渚水光暎山色長夏不知暑幽
人繫小舟來此坐容與嘯傲滌煩襟誰能送清滑

陪錢學士飲郁景章宅有詩見遺次韻

憶昔隨驥尾早承君子知同朝篤交義何殊鳳鳴岐寧
知信素履世路多艱危章公既觸穿錢公亦逢巇而我
復嬰禍三人各分馳雖云居患難志節同堅持諒是松

柏性不畏霜雪欺天道乃好還光輝今若斯司制起永
叔典樂咨后夔疲駕驂未乘敢辭筋力衰公皆國楨榦
允為天子毗拔茅誤及茹自揣夫何宜喜茲展清讌深
杯安足辭久別重歡聚豈伊人力為慷慨發高興示我
清新詩陽春本難和聊叙衷腸私

金蘭為華德題

父守正號怡蘭

蕙蘭被幽谷綠葉何紛披紫莖擢芳蕤芬吐清奇豈
同凡草伍自與修筠宜終歲抱貞獨不求人見知所以

君子心對之情自怡誰將丘壑容涅以黃金泥光輝燭人目粲粲生華滋外貌雖可奪至性終不移

九月十日王祭酒鷄鳴山登高分韻得日字

昨朝屬重陽陰雨何濛密今晨忽晴霽仰面見白日浮雲喜盡斂四野青山出司成重佳節招邀登翠峯遙指鷄籠巔茲焉遂閒逸極目騁遐矚一覽風景悉仰瞻寶公塔俯憇瞿曇室坐聽穎師琴泠泠鼓清律張筵對黃花酒泛金尊溢况我八九人俱是清閒秩緬思陶淵明

東籬興高率周雅詠鳳凰唐風歌蟋蟀若復不盡歡轉
盼流光失勝會苦難常後繼安可必明年知誰健莫厭
杯行疾

古詩七言

賦得天上麒麟歌壽盧大海

時正統改元除夕前二日大海即廷佐初

字也

麒麟本是天上物頭角峥嵘光五色紫皇案前頗馴擾
雷祖跨下尤奇特碧蹄蹀躞凌紫霞毛骨凜凜無纖瑕

忽然掣斷黃金鎖來降江南盧氏家多君生來最清澈
逸氣英英稱敏捷碧玉煖發藍田烟氷壺冷浸瑤空月
橫經早向芹宮遊文光夜夜摩斗牛佇看破浪出南海
一枝折落蟾宮秋祇今歲轂行將暮喜遇佳辰是初度
畫堂日暖篆烟長南極流輝照庭戶流霞滿酌琉璃卮
玉管鸞笙次第吹碧桃花底東風軟玄圃天中白日遲
神龍出圖龜出洛丹鳳翹翔入阿閣靈物紛紜感盛時
豈可將身老丘壑白駒疾去不可呼及時汗簡當涵濡

知君固是麒麟種姓名擬向麒麟圖

雙桂軒為侯給事臣賦

君家軒前雙桂株何年移植來庭隅深叢勁榦互盤錯
凌雲欲礙西飛鳥秋高木落萬山瘦不與凡卉同凋枯
鮮飙輕逗翠雲捲溥露微漬丹霞敷朝來海色在庭戶
照眼宛似柔桑扶又疑沒水走象罔同根綰出青珊瑚
借問此種塵世無云曾步月飛雙鳬覽裳笑舞綠陰下
珠宮貝闕開銀鋪吳剛假斧競斫取灑氣夜肅礙肌膚

素娥斂袂不暇惜但剩一片冰輪孤竒葩穠郁良可娛
歸路夐絕非人途共言持此獻闔閭捫參直上天闕呼
天顏一見喜曰都騰芳挺秀無纖汙勑培藝圃近槐棘
作我梁棟知非誣紅光爭射斗牛粲逆氣並吐虹蜺粗
仙標沐盡鳳池雨天香鴻入龍涎爐世人仰望起歆慕
似隔弱水瞻蓬壺我聞此語吁嗟乎冷然恍若餘醒甦
始知在人不在物乃比連枝二丈夫都林燕山世已徂
百年佳聲猶含符大喙絕倒敬駕奚奴大喙絕倒敬駕奚奴

敗荷鵠鵠扇面為盧大海題

薰葭滴露芙蓉死
畫舫嬌娃摘蓮子
蓮房摘盡雨蓋枯
幾柄猶存夕陽裏
鵠鵠羽翼何輕盈
隨風下上雙飛鳴
幾回謔浪學沙鳥
並立蓮塘如有情
烟寒水冷秋無際
畫史揮毫豈無意
入手看來倍感傷
閒倚南薰咏棠棣

題周中書璿畫松贈戚貢士文湍

東吳才子天池客
染翰從容在西掖
不嫌墨汁汚朝衣
愛向溪藤寫寒碧
淋漓元氣何老蒼
筋蟠骨立龍蛇僵

腥風灑地鱗甲紫震雷梨石鬚髯張天矯等空形蹲惡
一見驚人前復却持鏡欲勦千歲苓警露疑聞九臯鶴
英標自是梁棟姿頭角崢嶸應有時歲寒且為厲貞操
待用明堂非爾誰

捕魚圖為夏得中題

烟渚薰葭撲晴雪蓼花暗染猩猩血七月八月江水深
戲藻穿蒲飽魚鼈大船小船高揭蓬罩競入洄流中
碧濤徐捲手初舉錦鱗翠鬚翻秋風箇箇肥鮮真可愛

石火爭敵煮鮭菜收筒欲向浦口歸携筐擬就沙頭賣
船尾兒牽阿母裳瓦盆酒熟爺試嘗母笑持殮兒待哺
渾家共樂雲水鄉盡日忘情對鷗鳥萬事無縈貧亦好
却嫌富貴有危機此身甘伴滄浪老

竹坡為丁文暹賦

能畫

君家不種閒草木數竿碧立藍田玉此種知從何處移
若非湘浦應淇澳隣近時從一借看只疑誤入簷簷谷
幾回欲傍曲闌行履痕恐破莓苔綠由來士俗不可醫

多君標格真清奇碧窓半啟靜相對雅懷幽絕誰能知
鷓鴣飛去月當戶鳳鳥不鳴雲滿墀淡烟低抹翡翠羽
仙風擊碎珊瑚枝有時轟雷走巖壑繞地龍孫迸頭角
一夜新稍出短牆錦綺樸簌林邊脫渾訝團團保蓋張
轉驚葉葉金刀錯四簷寒影不勝清滿耳秋聲無處着
披襟但覺塵慮消豈容俗客當闋敲香殘琴罷趣閒逸
賸掃百幅鮫人綃只今紛紛何足數歲寒宜結冰霜交
莫恤頻過縱吟賞玉芽為我還須燒

蘆灘水禽圖

清霜乍落邊風高鴻鴈南征吹羽毛長天飛盡楚江晚
衝烟幾點投衡皋山骨孤奇水痕落晴沙一片平如削
虞機良少荔米多任爾從容飲還啄飲啄知誰伴寂寥
黃蘆白葦聲蕭蕭危稍半折蘸寒碧雪花不向波間消
收拾秋容入毫素應使弋人何所慕夜月西樓過數行
祇恐隨羣破汀霧

王舜畔山水為繆行人樸題

烟嵐萬壑吐復吞雨過汎漲溪流渾野橋山店夜初曉
杳靄不辨東西村嘉樹蒼蒼迷近遠白雲滾滾銀濤捲
苔封古道閒無人未放曦輪上孤轡舜畔王翁八十餘
眼明能看細字書醉揮老筆元氣俱風景似是圖匡廬
多君長才擅專對好山覽遍芙蓉翠看畫駢駢憶曉行
詩成正攬皇華轡

江村晚景圖為趙汝宏題

建炎六龍飛渡江江南有水分天潢王孫脫駕向何許

風景獨憐閩海傍東列二老峯南峙五馬山鳳凰胡蝶
相繚環金鰲突兀翠蓋覆文筆立掃雲烟間王孫來此
耽幽獨深入江村結蘿屋扁舟一葉傍漁磯醉裏浩歌
山水綠日落不歸去曲肱蓬底眠絲網高晒蘆花邊西
風欲下海鷗渚明月正墮蛟龍淵王孫已逐江流去今
見雲仍玉堂署百年世德動遐思毫端寫出滄洲趣玉
堂老仙來索詩詩拙不似斯圖奇多君自是神明後文
獻風流知在茲

題竹林圖

徃年京城少脩竹好事移植今頗多我屋庭前四五箇
鮮飄披拂青婆娑愛此渾如水蒼玉坐對清標良不俗
倚闌吟賞趣無窮洗盡胷襟塵萬斛紫芝山人人品高
風雨落筆聲瀟瀟渭川千畝鑿龍骨并刀剪入蛟人絍
初疑帝子雲中下葆蓋霓旌翠堪把復疑流水漱雲根
中隱徂徠逸游者山人山人爾多才今我一見心眼開
此境人間在何處便欲躡屐凌蒼苔洞簫石上吹一曲

月明定引鸞皇來君不見蕭郎憒貌湘浦秋後來獨步
文湖州近代商集賢更數柯丹丘意匠經營幹天巧却
美妙墨追前脩太史知從何處得掛向虛堂淨如拭不
須買地費栽培置身常在貲蓄側竹兮竹兮歲晚節愈
堅先生之德亦復然武公化去已千載為爾重歌淇澳
篇嗚呼為爾重歌淇澳篇

山水畫為祝給事題

連峯起伏如蟠龍幽壑下浸馮夷宮溪深水遠足魚鼈

時有孤舟垂釣翁人家幾簇依林薄共食溪鮮有真樂
黃鳥啼殘碧樹枝白雲鎖斷青山腳錢鏗之孫寫作圖
筆法不讓方方壺當時清隱宛在目萬朵芙蓉浮太湖
我亦有居環水竹西風吹老千竿玉披圖日夜憶江南
夢繞溪頭舊茅屋

題渝川鄒貴彝墨竹有序

渝川鄒君貴彝購得墨君一幅筆勢精巧甚有生意蓋
古蹟也君寶愛之示予索題其端予素愛竹而未得種

竹之法移輒不活因覩是圖不覺起予之歆羨也遂賦此以歸之

平生愛竹漸成癖幽叢每欲從人移當軒一本頗失養
隔歲頓令枝葉萎長鐫劙去良可惜月夕風晨秋寂寂
鄒君過我出此圖爽氣飄飄生兩腋渭川淇澳千萬竿
瀟湘兩岸烟水寒天生勝境不能往咫尺盡向毫端看
老幹新梢生意足籜龍怒角抽寒玉鬚髯風雷起平麓
只恐高飛穿我屋看罷殷勤捲付君持歸遠到清江瀆高

堂素壁時掛此何須別種簀管雲君不聞此君一日不可無栽培灌漑胡為乎不如似君寫數挺舉杯吟對聊相娛

萬里江山圖為唐縣史賦

先生之卷不盈尺中有萬里江山圖展圖心目頓開豁
一葉況見烟波徒嗟我平生好遊覽夢魂長夜飛江湖
微官羈絆不能往悵望漢廣峨眉孤盡工毫素得真趣
簸蕩海若并天吳三峽濤痕繞白帝九疑翠色連蒼梧
安得乘風破巨浪飽帆瞬息追奔鳥宜君得此重愛惜

青藜夜光驚僕奴珍藏什襲豈無意寧止供玩資吟娛
問津非欲近星渚梯雲應擬游清都詩成莫動海天想
且對西山傾百壺

題成侍御清風亭歌有序

侍御成澹菴善為竹寫真嘗築亭於故山小金峯下滄
浪池上效雲林子友石生篆籀法作萬竹於亭壁入其
中爽然若清風之襲人也字其亭為清風而屬予賦之
雲林之子骨已塵九龍山人亦復往今日滄浪有澹仙

篆籀獨追秦漢上結亭正傍小金峯素壁虛白四座空
醉揮瑩帚掃萬玉烟梢葉葉含清風清風翛翛石牀冷
夢入壺天吹不醒興來吟斷碧池秋身上瀟湘水雲境
紅塵不受暑不侵簾龍滿壑幽且深墨華盡帶科斗跡
翠袖疑傳環珮音亭中有書兼有畫牙籤如鱗插高架
業成射策謁九重一日四海聞聲價鐵冠執法寶殿東
衣繡更騎青海驄霜臺默坐對古柏歲寒標格將無同
澹仙為我同年友十載論交託詩酒我欲從之訪此君

因風問訊平安否

題山水畫

蓬島烟消翠光濕巨鰐不動蛟龍蟄壺天地暖自長春
瑤草琪花俯堪拾重樓信是仙者居十二玉闌臨碧虛
吹笙時下子晉鶴命駕或上琴高魚瑤池宴罷剛風起
歸馭飄車凌弱水一羽飄飄瞬息間飛度洪流三萬里
塵氛溷溷非我徒借鵬正欲尋麻姑手掀星斗遡寥廓
何用坐守燒丹爐

脩竹仕女

芳閨倦繡清晝長小園踏碎苔花香鳴璫閒過碧筠塢
驚起玉枝雙鳳凰雲鬟半解嬌無力含顰似怯蓮金窄
欲將瑤瑟吊湘靈翠袖生寒彈不得幾回脉脉立斜曛
林下仙風吹茜裙應恨韶華若流水歲晚青青輸此君

何太守雲山圖為江侍讀賦

米丞墨妙非等閒百年復有高房山只今竹鶴何太守
意營慘淡能追攀連峯半露蒼龍脊雲起溟濛翠光濕

小橋流水綠通村野艇無人閒傍石清溪萬頃淨不波
溪上茅屋空烟蘿巖穴誰云遺逸多惟有叢桂山之阿
嗟我平生偏愛畫敗素豪縑不論價近得四幅旋失之
却嘆通神皆羽化玉堂老仙之愛與我同朝回對此心
神融便欲因君買東絹為乞援毫圖華嵩

萬里江山圖為浦友謙賦

乾坤渾沌二氣相盪摩盤古未出浩劫渺渺知如何一
從高下奠清濁山岳峙立流江河至今山作漾沙勢水

載厚地無停波百川萬折競趨海連峯迤邐堆青螺嗟
我閒情本好遊一官束縛如繭窠天生好景在人世未
得放棹窮經過老彭翛翛江海客胥蟠造化誰能識醉
握手錐寫作圖萬里分明歸咫尺風雨溟濛元氣俱林
靄陰森鬼神泣令我披圖思爽然恍若掀蓬倚秋壁高
者何為如削玉峨眉熊耳通巴蜀低者何為如伏象灔
瀨瞿塘雪濤漲遠如羣龍飛上天近如萬馬奔飲泉深
壑幽沉積蒼翠淺渚洄洑涵清漣巫峯十二淨可摘瑤

簾散擲夢門邊漢皋春晚客遺珮湘浦曉涼人刺船山長水遠望不極滿目但見浮嵐烟錫山浦君最瀟灑不愛黃金偏愛畫得此何殊席上珍白璧明珠喜盈把君不見平生李謫仙千載馬子長足跡所到皆文章芳名不逐草木腐直與山水爭輝光寧知此興亦不淺撫卷為君歌慨慷還君之畫停我筆呼童捉酒澆詩腸

陳貞女詩

未嫁夫亡自縊而死

陳家有女年正芳修容毓秀居蘭房詩書女誠過目誦

保抱諸弟淑且良父母生平最鍾愛明珠在掌門楣光
一朝許為舒氏婦夫婿賢美年相當通名納采幣行久
及時待叶于飛祥宦遊浙上甫堪羨客死淮陰殊可傷
蓬山願結連理樹丹穴竟作孤栖凰含悲扼吭氣頓絕
從一以歿禮所防寸心貞烈貫金石萬古大義扶綱常
玉環擊斷痛莫續寶劍悞分終共藏始知至性本天賦
况乃茂族由冠裳英靈颯爽骨不朽鎮重富媼摩穹蒼
事君携貳返不逮泯滅何異露與霜更生有傳我欲繼

作詩聊為先揄揚

題李瓊司訓先生廬山圖二十二韻

有序

京庠司教萬載李先生清雅博物士也嘗得顏夏官廬山圖一幅甚保愛之間索予題其上廬為古之敷淺原也自崑崙分支南為衡岳東南為五嶺東北為廬山其景最奇絕古之幽人逸士往往遯跡其間予每慕之而未嘗親歷其地有愧於子長者多矣披閱之餘賦此以塞其意云

我聞匡廬鎮南服云是禹貢敷淺原崑崙支脉遠分析衡
岳五嶺遇相連大江西來浪翻屋萬古屹立洪濤前層巒
疊嶂數千仞五老香爐凝翠烟金輪紫霄蕩白日鶴鳴雙
劍摩蒼天冰簾一片瀉空濶元氣噴薄銀河懸昭明舊隱
在何處中有古寺名開先漱玉之亭最奇勝飛瀑正注神
龍淵棲賢谷西白鹿洞李渤讀書今幾年濯纓枕流雙蟠
蛻突兀共跨清波眠陶潛醉石亘長磽遠公東林開白蓮
平生慨想不一到夢繞落星湖水邊五羊頽君南海客曾

中丘壑誰能先興來潑墨寫此景妙奪造化天無權青山
蜿蜒欲飛去滿壑浮雲紛孽綿澄江浩浩渺無際但見萬
里乘風船漁村樵徑徧林麓有路宛達諸峯巔披圖可望
不可即似隔弱水觀蓬玄先生鑒別稱儼然實惜不啻瓊
瑤鐫高堂素壁時掛此頓使襟懷塵慮蠲朝來索我賦長
句愧乏大筆揮如椽何當把酒呼李白共和六一山高篇

題畫海東青歌

有鳥橫絕來海東白日片雪飄天風決雲萬里過榆塞

歛翩誤投虞網中三韓五島渺何許此地胡為遭罿籠
將軍得之不敢畜愛護獻入明光宮神姿矯矯託纊素
特立似與銀瓶同劍鋒新淬勁翎整玉花細縷奇毛豐
星眸瓊吻水晶距英氣滿韁真俊雄常思霜鵝上霄漢
肯爭腐鼠趨蒿蓬聖明端拱罷遊獵雖有長技誰能窮
何當為爾解絛鏃看擊凡禽摩碧空

海東青鶻屬鳥之鷙者中國所不產出遼海之北東海
之西濟喇敏之地夷人往往以之入貢武定侯郭公鎮

宣府時軍校有舉網得之者公乃獻之於朝而命工畫者圖肖其狀其子聰請題於予故為賦短歌如右云

題李白應召圖

仙人本在九天上謫向人間特豪放酒酣詩思捲滄溟
吐出燄光萬丈名花歡賞宜新聲玉環正倚沉香亭
翰林供奉在何許天子呼來猶未醒清平調進詞偏美
白璧青蠅生暗毀采石江頭恨不窮明月沉沉浸秋水

倪文僖集卷三

欽定四庫全書

集部

倪文僖集卷五

四

詳校官庶吉士臣陳若霖

中書臣劉源溥覆勘

總校官檢討臣何思鈞

校對官編修臣汪鏞

謄錄監生臣李崇實

欽定四庫全書

倪文僖集卷四

明 倪謙 撰

古詩七言

應制寧戚扣角圖歌

景泰三年閏九月十三日

齊桓有國東海頭
賢聲藉藉聞
諸侯會盟歃血霸中土
能以大義尊宗周
當時左右賴良弼
弓旌不惜頻招求
君門萬里孰能達
猶有隱淪甘飯牛
甯生驅車臥牛下

夜叩牛角商聲謳南山白石發高興坐歎堯舜逢無由
短衣至骭老貧賤壯志功名行且休公聞歌聲加敬禮
知乃異士非常流一朝振拔置相位宵旰與之圖治謀
功光賜履保民社麟筆曾經宣聖修攘夷匡世豈不美
惜假仁義無弘猷何如聖主建皇極釣渭畔莘俱見收
羣賢致主邁三五寧有耆畯居林阪賡歌響谷在庭陛
永固皇圖千萬秋

三顧圖

炎精燭餘耀赫赫樓桑村寧知大耳兒乃是隆準孫東都九鼎忽傾側羣雄盼昧孰敢捫當塗朵頤獨凶悖却遷入許將豪眷將軍仗鉞正宸極飛羽桓桓萬人敵間關荆楚功不建拊髀幾回增嘆息一朝永鑑稱臥龍三顧枉駕來隆中奮髯躍起翊天步契分交驩魚水同興復遑遑竭心膂赤壁東風飛一炬遂令鼎足地三分立國西南拓疆宇出師表八陣圖忠烈智略古所無渭南乃逢狼顧徒兩敵相遇非天乎英聲義氣垂千古仰見

遺容膺獨拊王佐堪追伊呂儕若論管蕭安足數

山水畫

碧山在水江無波小舟一葉如飛梭山光壓舟載不起
滿目排空橫翠蛾中林可是揚雄宅路指巖阿放舟入
問字須教酒剩携誰識先生玄尚白苔封蘚蝕一徑微
綠蘿古樹環荆扉陰嵐漠漠每入戶空翠濛濛常濕衣
夜來一雨經林藪添得江聲滿前浦開門萬壑總浮雲
吞却山根猶未吐幽隣雅好能無同一簇人家居瀼東

危橋策杖從小童來往惟應秦亭翁嗟哉臥龍號隱約
何似為霖徧寥廓君不見伊尹當年畊有莘三聘幡然

起丘壑

題松鶴圖

高堂屏障開見此古君子昂然塵外姿何日傳畫史蒼苔緩步雙足高楚楚臨風梳羽毛引吭清唳向寥廓聲振林木驚寒臯千年頂上丹砂重素翩翩躚欲飛動青田路遠可思歸赤壁江空曾入夢骨清本是絕粒仙樓

息合居雲水邊半谿新派瀉寒玉一樹古松搖翠烟寫
真舊數薛少保此筆人間亦應少子晉瑤笙杳不逢雙
雙影落綏山曉披圖愛爾非凡禽萬里常存瀛海心人
寰一夜忽超越碧漢徒傳空外音

萬壑蒼煙卷為鄒允達賦并序

金陵鳳凰臺之西有勝地焉鄒君允達先塋之所閟也
塋之外嘗闢別墅以當山水之會有古松數萬株望之
鬱然相繆若蛟龍蜿蜒擎雲攫石交綰爭奮入其中翠

濤滿耳蒼雪灑衣林霏澗靄爽人心目不知塵氣之侵
暑氣之及而身之在人間世也先達樂之恒避諠巖修
其間聞秋官郎中周公善繪事乃請為鬚叟寫真既成
因命之曰萬壑蒼烟要予賦之久有以復也今春
會試來京謂予曰此圖必得子詩與之爭蒼古可也予
媿其意勉為一歌書以為先容若予者豈能發後凋之
奇然允達英邁有氣節磊落不羣觀其志尚足以知其
人矣歌曰

君不見泰山之巔蟠老龍高蓋偃蹇排寒冬參天自是
隔風雨胡乃坐累秦人封又不見匡廬之崖霜雪盛馬
鬚塵尾枝交映已從方士資養生更向桑門作談柄何
如鳳臺之西千萬裁一一長身封綠苔貞姿高潔負奇
氣蹀砌總是明堂才乍疑森森劍佩羽林客怒髮衝冠
鐵衣澁又疑翩翩雲罕紛前驅翠葆碧幢攢列戟大株
小株鱗甲堅正直豈畏藤蘿纏露滋雨洗淨如沐但見
萬壑搖蒼煙道鄉之孫我之友愛隱松闕與松偶城市

紅塵沒馬深誰解尋盟歲寒叟秋官放筆寫作圖墨華
滿紙煙糲糊經雷蛻骨縮人瘦拔地怪柯編虎鬚披圖
浩歌對君酌素雲絕勝蒼煙壑上苑霏微煙更多來遊
好控巢松鶴

山水畫為李考功題

倚天壁立青芙蓉蜿蜒起伏如遊龍夜來驚雷挾飛雨
化作白雲千萬重白雲如波起平地樓臺不辨金銀氣
但見蒼蒼玉女峯離立分明露羣巒山深寂歷天欲秋

重重綠樹臨溪流無人復歌小山隱惟有桂樹枝相樛
披圖似是房山筆元氣淋漓墨華濕并刀剪取滄溟波
方丈蓬壺歸咫尺天官李卿家上饒早謝舊隱登清朝
看山莫憶釣遊處且作夔龍匡舜堯

題母子虎圖為許寬序班賦

南山蒼蔚何蒼蒼深叢巢穴虎所藏貞嵎長嘯百獸恐
時取黃犧充饑腸雌雄乳孫并哺子引向人間聊戲耳
世人只謂勢生獮寧識馴然有如此良工意到筆法精

長纏掃出於菟形松根激石怒濤捲疑有獵獵雄風生
我愛此圖深有補猛惡猶知依父母何事人間梟獍徒
面目雖人不如虎

溪山琴意圖

我生雖有煙霞癖玩水窮山記疇昔一從為宦步青雲
閒却登山雙短屐忽驚尺幅墮我前墳屹翠岫浮嵐煙
清溪雨過碧波漲石罅潺潺皆流泉濃綠陰森擁高樹
樹杪晴雲如璧絮誰向磯頭結小亭占斷溪山最佳趣

亭中有客藉紫苔抱膝長嘯襟懷開瑤琴宜鼓水雲操
已見蒼頭携到來轉軒何當彈一曲坐想餘音振空谷
遊魚出聽鶴鳴臯雲根細和泠泠玉幽人適興山水間
白雲靜與人俱閒溪居疑隔鷺鷗渚殘照滿崖猶未還
慚予謬應賓興舉竊祿無能報明主看畫悠然憶釣遊
思繞江鄉舊衡宇

雪擁藍關圖

西方有佛名浮屠形神寂滅久已殂何年委此趾與顱

流傳震旦惟其徒唐宗信重如璉瑚遙自鳳翔迎至都
韓公抗疏懼伏蒲願投水火斥其誣忤旨謫逐瘴海隅
迢迢遠道勞馳驅于時嚴冬雪載塗藍闕秦嶺雲糲糊
老成有子字清夫冒寒憇勞驚相呼作詩示意嗟可吁
衰朽之骨其收吾一身不惜萬里徂人心復正賴公扶
曾聞頃刻金花敷詩聯湧出此則符湘乎仙乎知有無
至今畫史寫作圖

滄浪美笛圖

江楓翻緋松葉青江水湛碧迷煙汀隔江好山開翠屏
閒漁罷釣舟為停船頭晏坐景清絕手把湘臯紫筠節
老龍吟秋吹一闋響遏行雲山石裂天吳鶩起風捲波
紛紛亂落梅花多安得桓野王岸上來相遇便呼拍浪
兒獨速舞短簫相與三弄滄浪歌

商山四皓圖

商山鬱嵯峨中有三秀芝四皓此避秦採擗充其飢清
泉白石境幽曠長日消盡松陰碁羸網高張正流毒冥

鴻矯翼安能羈一朝軼道口銜璧萬方耿耿炎精赤據
床幔罵溺儒冠巖穴深藏甘斂跡誰知衽席間以愛迷
至公國本將遂移母后計亦窮偉哉留侯建奇策禮幣
直走商山中翩翩乃偕來願為太子死赤帝見之驚公
胡至於此把酒相看意慘悽黃鸝歌殘泪如水一出重
九鼎漢業安如山拂衣不受萬鍾祿為樂孰似商山間
高風杳邈仰圖畫名與茲山同不刊

金人五馬擊毬圖

長白山高連海東混同江深盤黑龍金源立國素彊廣
拜天射柳毬場中毬場如鏡灑油築不使砂礫碍馬足
何處飛來兩三騎窄袖輕衫緊粧束錦鞚玉勒黃金羈
相攢都來二十蹄毬星一點下還上杖月半灣高復低
毬驚杖奮隨手脫臂轉身翻競擎攫過馬渾疑飛彈侵
睡龍可信明珠落奔騰便捷勇莫當縱獵忽來遼海傍
揮鞭一舉指燕代南瞻赤焰無精光百年世事如流水
古蔡城西歎多壘竹屋淒風吹斷煙千載幽蘭抱香死

當年意氣掃地無乃知恃力非良圖披圖懷古增慷慨
端拱修攘真遠謨

觀奕爛柯圖

野樵撥雲來翠微深林曲磽探幽奇息肩暫憇古崖側
忽遇兩鬚閒奕碁佇立相看未終局斧柯已爛何其速
自是壺天日月長却驚世上流年促

吳廷暉山水為陳秋官題

扶桑冉冉金烏飛翠連萬朵迎朝暉瓊雲捲絮互吞吐

王女峯頭應晒衣山深似是蓬萊島弱水無波自環繞
五粒松枝千歲桃中有仙人拾瑤草流泉百尺垂晴虹
高閣下瞰馮夷宮幽亭隔渚對深院赤闌遠見危橋通
眼前佳景看不足更愛漁舟兩相逐安得投閒美水雲
來侶魚鰈友麋鹿

題健兒牧馬圖

龍河四月春始回健兒縱牧沙場隈坡陀草軟茁新綠
騰驤風逸皆龍媒羣飲團圓藉鞍韁漣酪分嘗紅入面

四弦彈出塞外聲醉起蹁躚舞胡旋聖皇恩露覃
宴樂休養能生全只今銜尾盡入貢日見赤墀千萬牽

題竹石山鳥

楚江暮雨迷蒼梧淋漓綠玉煙糲糊巢深何處宿鸞鳳
聲斷不聞啼鷗鷗一竿濕重欹疎翠山骨巉岩露鼈背
孤倉特立此栖身何異幽人獨沉晦昂頭緘嗟常忍飢
羽毛應待朝陽晞明看旭日放新霽一任長空萬里飛

綺謳三疊

并序

鎮朔將軍總兵官武強伯楊公將畧兵威深仁厚德足
以服北塞而惠邊人忽爾中道傾逝哀慕何極靈輶載
道返葬京師乃作綿謳三疊俾執絰者歌之以助哀云
燕然燕然高挿天上摩日月含雲煙屹如砥柱鎮北鄙
殘敵睥睨不敢前具瞻方為人倚賴一旦傾頽嗟變遷
嗚呼謳兮謳聲切霜雪入樹皆僵折

洋洋河水潺潺銀漢下注來人間潤滋邊地足生植
循山激石波回環洪深正資人飲漱奔流入海何由還

嗚呼二謳兮謳益愴貌狀百萬精神喪

上谷上谷連朔漠戍樓清切鳴鼓角英威遠振邊塵空
天驕聞風盡膽落皇天不弔心孔哀將星夜殯何蕭索
嗚呼三謳兮謳已終重城萬里來悲風

朱繡衣母陳孺人壽詩二十四韻

東風二月春無涯堂背競開萱草花倚門喜聽噪簷鵲
忽報遠道兒還家遠道兒還自何所玉闌紫塞迎風沙
兒從前年持憲節邊城遍歷臨荒遐嚴霜凜凜拂繡斧

攬轡瞻落青驄騁幽障雲收絕烽火深戍日落鳴寒笳
威宣德洽境寧謐馬肥豐草兵無譁豈不懷歸養阿母
載驅四牡歌皇華流光荏苒歲兩閱細數歸期忻及瓜
昨來受代整朝佩銀河水暖回仙槎龍樓入觀五雲曉
天顏有喜承褒嘉下堂阿母重迎勞問兒久別時何賒
誰知說悅正初度母子懽聚人爭誇况樹高門表貞節
命服煌煌榮猩珈童顏紅暉體康健綠鬚未改如堆鴉
壽筵弘敞襍尊俎鼓樂盡聞頻過繡衣新換綵衣舞

香雲鵠鵠籠烏紗
新婦將孫拜堂上
桂枝挺秀蘭抽芽
幕開黃雀自堪饌
冰泮白魚還可义
才聞王母致碧觴
又見小玉供胡麻
更看伯婆年八十一
門雙節無纖瑕
晚膺祿養享胡福
人生至樂誰能加
我觀南極吐光耀
賦罷南陔空歎嗟
何由升堂祝母壽
玉盃春酒傾流霞

周秋官山水畫為李貞外題

江村杳靄路不分
野人作伴鹿與麅
五月六月雨三日
千山萬山皆白雲
平堤漫漫江水綠
翠樹重重覆蘿屋

苔封石徑絕行蹤持鏡何處尋黃獨模糊潑墨掃煙鬟
前代畫手稱房山郎官意匠得其趣嵐光不散迷辱顏
多君生長山水窟到處愛山常挂笏寧知皓首出榆闕坐
對燕然惟咄咄天台鴈蕩浙水東夜夜家山鄉夢濃
有待拂衣歸舊隱與君林下會相逢

烟竹為鄒侍郎賦

美人遙隔瀟湘渚一望琅玕翠如許欲往從之路阻長
兩岸冥冥足煙雨雨餘滿林秋氣清綠烟常向滄江橫

日高不辨鷓鴣影風細時聞鸞鳳聲萬竿玉立何瀟灑
誰把霜毫為君寫遠水平吞青草湖寒雲迥接蒼梧野
老仙公退居南宮愛此湘皋冰雪叢莫嫌歲晚鎮相對
為與此君標格同

夏景詩意畫為于景瞻題并序

前府軍于君景瞻謫居上谷予亦繼往卜隣幾四載矣
今春同荷恩釋南歸故鄉出陳興祖所畫唐高駢山亭
夏日詩意索題予閱之宛然湖山甲第故家景物乃若

煩興祖先為之者而君得之良不偶也君之歸水光山
色朝登夕眺固已飽餐有不待觀斯畫而意興自足但
欲就君軒楹之末平分半榻招黃鶴而邀飛仙歌遠遊
之篇舉流霞之觴一洗千古塵土胸臆不知肯著老夫
否因詩以訊之

柳花飛盡春歸後翠屋重重嘉樹茂日長庭院梅雨過滿地
濃陰間白晝參差池館倚碧空臺榭半臨湖水中曲欄飛棟
落晴影分明倒浸馮夷宮誰言綠暗紅芳歇一架薔薇染猩

血棕櫚葉戰起薰風萬斛沉檀座中爇珠簾掛在珊瑚釣暑
氣不侵樓上頭嫩涼細細透白苧天吳供與人間秋衝煙白
鳥飛頻到蹕渚鮮鱗俯堪釣抱琴逸士許登臨倚檻幽人從
笑傲荆闌妙手真絕奇毫端寫出無聲詩清漣傑構照雙眼
佳境似倩夸娥移深深門逕紅塵隔此地寧容車馬客剗
水閒居賀監家輞川別墅王維宅君辭舊隱西河濱幾
載看家憑四隣只今歸去手親理聖恩已許為閒人踏
花旋掃湖邊路霧閣雲窗總如故嘯歌聲落雲水鄉

水伯山靈亦驚顧。蹇予自斥青瑣班。與君住對燕然山。
枯魚縱壑馬脫韁。放舟同向江南還。何時訪君帆獨掛。
來賞湖山避炎夏。置身俱在圖畫間。奚用重看古人畫。
題赤壁圖為錢景和賦

坡仙豪氣隘八荒。馬羈天脫神龍驥。思如百川赴東海。
嬉笑怒罵皆文章。天門萋菲多鬼蜮。放浪遠投雲水鄉。
江山如此良不惡。况有赤壁臨滄浪。天存此景似相待。
新秋灝氣傳清商。老仙載酒赤壁下。煙波萬頃一葦航。

是時東山月始出浩歌棹雪迎流光清風徐來水波靜
毛骨颯爽生微涼憑虛浩浩不知止空明坐擊凌蒼茫
水天一色粲星斗恍若有路通銀潢座中何人吹紫玉
嗚嗚怨泣孤舟嫋倚歌相和豁襟抱拊景慷慨悲興亡
山川千古留霸跡東望夏口西武昌昔當曹瞞順流下
舳艤千里旌旗揚臨江灑酒氣何壯傲睨已滅孫吳疆
東風一炬悉灰燼廟筭豈料輸周郎只令英雄果何在
惟剩山色摩青蒼寄形宇內海一粟日月苦短江流長

遊挾飛仙不可得有酒且共澆詩腸江風山月不須買
匏尊相屬樂未央洗盃更酌醒復醉枕罍頽臥夫何妨
後此時維冬十月重繼斯遊從雪堂仙霓化去邈千載
獨遺二賦鏗琳琅我曾奉使向荆楚扁舟載月經蘄黃
醉呼坡仙酌赤壁招魂擬欲憑巫陽橫江尚見舊孤鶴
掠舟西去蹣玄裳愧無詞賦續高興夢想風流今幾霜
良工意匠有深趣筆妙不讓顧長康平生於公想與慕
愛貌此景歸毫芒一朝眼底且驚見彷彿坐我尊俎傍

始知人生貴適意何用屑屑嗟行藏

雙松圖為陳叔謙賦

幾年遊宦紅塵陌處處垂楊陰華宅東風吹春入綺園
名花旖旎饒顏色東家錦幄籠牡丹西家紅藥園雕闌
鬆偃蹇挺孤秀詩人移植庭前看陳生好事者家有
琴月樓繞樓不種閒草木從人貌得雙蒼蚪彈琴玩月
有真趣歲寒對此情夷猶披圖一見之如向徂徠野天
風颯颯毛骨寒恍訝奔濤座中瀉却嗟舉世愛妍華得

似陳生憐醜醜抽毫為生賦思與神俱清何當登生樓
試鼓三尺永洗我平生塵土夢刃蕭聰作松風聲

孤鳳吟

并序

呂氏為趙氏婦四歲喪其夫方當盛年能守志不易以
養其姑育其子趙氏賴以不墜其節堅其孝篤誠世所
鮮及者矣朝廷既旌其門君子又多為詩文以美之呂
氏之志足以白于天下矣故予為作孤鳳吟以述其志
云

鳳皇巢丹穴雙飛復雙棲生雛甫三歲鳳去竟不歸孤
凰失偶鳴聲悲欲隨鳳死念雛饑况鳳遺老母風雨巢
傾危草巢養哺母與雛誓言不逐他鳳飛母健喜有託
雛成毛羽奇海水可竭山可移孤凰之志終不虧百鳥
慕節孝上達天帝知天帝旌其巢千古萬古聲名垂

送徐泰士亨知羅田

我帆纔向清源落君舟亦來閘河泊客邊相見喜無涯
握手交驩叙疇昨自驚別君數載餘不知出處今何如

為言已預烏臺選一官左授羅田除聞君之言為君惜無乃多財被時疾明經鄉校舊無雙射策君門曾第一時遭詆訾妄見疑覆試禁垣文益奇真金百鍊愈精徹燈燭四海聲名馳從此材華日增重宜侍清班居法從何為猶以富生嫌造物於人真戲弄龍媒逸步遊天衢局促乃同轍下駒牛刀小試衆稱屈感事撫時增歎吁此去羅田亦不惡百里熙熙事耕鑿得官且足為親榮臨治應須究民瘼君母自餕當自寬人心感化知非難

好敷仁惠及封內自有美譽聞朝端綠楊兩岸搖晴色
水滿官河留不得丈夫壯志貴遠圖九萬從茲展修翮

倪文僖集卷四